

Odluka kojom se proglašava Zakon o izmjenama i dopunama Zakona o krivičnom postupku Republike Srpske

Koristeći se ovlaštenjima koja su visokom predstavniku data učlanu V Aneksa 10 (Sporazum o civilnoj implementaciji Mirovnog ugovora) Općeg okvirnog sporazuma za mir u Bosni i Hercegovini, prema kojem je visoki predstavnik konačni autoritet u zemlji u pogledu tumačenja pomenutog Sporazuma o civilnoj implementaciji Mirovnog ugovora; i posebno uzevši u obzir član II. 1. (d) gore navedenog Sporazuma, prema kojem visoki predstavnik “pruža pomoć, kada to ocijeni neophodnim, u iznalaženju rješenja za sve probleme koji se pojave u vezi sa civilnom implementacijom”;

Pozivajući se na stav XI. 2. Zaključaka Konferencije za implementaciju mira održane u Bonu 9. i 10. decembra 1997. godine, u kojem je Vijeće za implementaciju mira pozdravilo namjeru visokog predstavnika da iskoristi svoj konačni autoritet u zemlji u pogledu tumačenja Sporazuma o civilnoj implementaciji Mirovnog ugovora kako bi pomogao u iznalaženju rješenja za probleme, kako je prethodno rečeno, “donošenjem obavezujućih odluka, kada to bude smatrao neophodnim”, u vezi sa određenim pitanjima, uključujući (u skladu sa tačkom (c) ovog stava) i “mjere u svrhu osiguranja implementacije Mirovnog sporazuma na čitavoj teritoriji Bosne i Hercegovine i njenih entiteta”;

Pozivajući se dalje na tačku 12.1. Deklaracije Vijeća za implementaciju mira, koje se sastalo u Madridu, 15. i 16. decembra 1998. godine, u kojoj se jasno kaže da Vijeće smatra da uspostavljanje vladavine prava, u koju svi građani imaju povjerenje, predstavlja preduslov za dugotrajni mir i

samoodrživu ekonomiju koja je u stanju da privuče i zadrži strane i domaće ulagače;

Imajući u vidu namjeru Upravnog odbora Vijeća za implementaciju mira iskazanu u februaru 2002. da se vladavina prava u Bosni i Hercegovini ojača putem izrade i provođenja novih krivičnih zakona i jačanjem sudskih i tužilačkih institucija u cijeloj Bosni i Hercegovini;

Konstatujući da iako mogućnost odbijanja svjedočenja u toku sudskog postupka služi važnom strateškom interesu zaštite porodičnih veza, na nju se treba pozivati samo u rijetkim slučajevima;

Svjestan činjenice da se ovim Zakonom utvrđuje obaveza svih građana da sarađuju u istrazi i krivičnom gonjenju;

Uzevši u obzir i razmotrivši sve navedeno, visoki predstavnik donosi sljedeću

ODLUKU

kojom se proglašava Zakon o izmjenama i dopunama Zakona o krivičnom postupku Republike Srpske

(“Službeni glasnik Republike Srpske”, br. 50/03)

koji se nalazi u prilogu Odluke i čini njen sastavni dio.

Ovaj Zakon se objavljuje na službenoj internet stranici Ureda visokog predstavnika i stupa na snagu odmah kao zakon Republike Srpske, na privremenoj osnovi, sve dok ga Narodna skupština Republike Srpske ne usvoji u istom obliku, bez izmjena i dopuna i bez dodatnih uslova.

Ova odluka stupa na snagu odmah i odmah se objavljuje u “Službenom glasniku Republike Srpske”.

Sarajevo , 16. decembar 2004. godine

Paddy Ashdown

Visoki predstavnik

ZAKON O IZMJENAMA I DOPUNAMA ZAKONA O KRIVIČNOM POSTUPKU REPUBLIKE SRPSKE

Zakon o krivičnom postupku Republike Srpske ("Službeni glasnik Republike Srpske", br. 50/03) mijenja se i dopunjuje kako slijedi:

Član 1.

U članu 20. (*Osnovni pojmovi*) tačka g) se mijenja i glasi:

g) "Ovlašteno službeno lice" je ono lice koje ima odgovarajuća ovlaštenja unutar policijskih tijela Bosne i Hercegovine, uključujući i Državnu agenciju za istrage i zaštitu i Državnu graničnu službu, policijskih organa Republike Srpske, sudske i finansijske policije, kao i carinskih organa, poreskih organa i organa vojne policije Bosne i Hercegovine ili Republike Srpske."

Iza tačke s) dodaje se nova tačka t) koja glasi:

"t) "Supružnik" i "vanbračni partner" su ona lica koja taj status imaju prema porodičnom pravu."

Član 2.

U članu 147. (*Lica koja mogu odbiti svjedočenje*), stavu 1., tačka b) se mijenja i glasi:

"b) roditelj ili dijete, usvojlac ili usvojenik osumnjičenog odnosno optuženog."

Tačka c) se briše.

Član 3.

U članu 299. (*Subjekti žalbe*), stavu 2. riječi: "srodnik po krvi u pravoj liniji, usvojlac, usvojenik, brat, sestra i hranilac" se zamjenjuju riječima "roditelj ili dijete i usvojlac odnosno usvojenik"

Član 4.

Ovaj Zakon stupa na snagu odmah i odmah se objavljuje u "Službenom glasniku Republike Srpske".